

DISCOVERS

MIRACVLEUX DE
DEVX FONTAINES DES-
couvertes à deux lieuës près de la
ville de Langres , au village de
Corgirenou.

*Avec les moms de ceux qui ont recen
guarison d'icelles fontaines.*

LE TOVT AVEC APPROBATION
de Monseigneur l'Euesque & Duc de Lan-
gres , Pair de France , & Commandeur
de l'Ordre du S. Esprit, Con^{cr} du Roy
en ses Conseils d'Estat & Priué.



A PARIS,

Pour Iean du Brayet , & Nicolas Rouillet,
au Pallais,

1603.

AVEC PERMISSION.





L'ORDRE QVI S'EST

OBSERVE' EN LA DESCENTE

qu'à fait Monseigneur de Langres
pour visiter les fontaines de Cor-
girennon : Et au procès verbal qui
s'en est dressé.

Premierement, l' *Auant-propos*
de mondit Seigneur, auquel est
contenuë la cause de ceste descen-
te, & ce qui s'est passé à son arriuée.

Secondement, la description desdites
fontaines, de leur situation, espreuve fai-
te de leurs eaux, par le goust, poix, ebul-
lition alambiquement, & distillation par
feultre.

Tiercement, est exposée la cause du
bruit, & opinion qu'elles ont eu d'appor-
ter guerison.

En quatriesme lieu, est l'information
les effects causez par lesdictes eaux, au

parauant la venue de mondit Seigneur.

En cinquiesme lieu sont lesdicts effests
veuz par les deputeZ de mondit Seigneur
pendant leur seiour audit lieu de Corgire-
non.

Finalemēt le iugement qui se peut
faire de la vertu & puissance desdictes
eaux. Et l'authoritē de Monseigneur y
apposee.



CHARLES DESCARS Euesque, Duc de Lengres, Pair de France, & Commandeur de l'Ordre du S. Esprit, Conseiller du Roy en ses Conseils d'Estat & Priué; A tous ceux qui ces presentes verront, Salut. Nous ayant esté deuëment par plusieurs fois aduertis de quelque grãde affluence de peuple qui se faisoit de toutes parts en vn village de nostre Diocese nommé Corgirenon, dependant de la Seigneurie de Messieurs le Doyen & Chanoynes de nostre Eglise de Lengres, sur le subiect de deux fontaines lesquelles récemment s'y estoient ouuertes, & en reputation de causer guerison aux malades, & vlcerez qui beuuoient & se lauoient des eaües d'icelles. En outre ayant entendu que sous pretexte du recouurement de sant^e corporelle se commettoient quelques abus touchant le culte & l'honneur deu á Dieu, & contre la coustume de tout temps obseruee en l'Eglise Catholique Apostolique & Romaine, estimants que c'estoit de nostre deuoir de recognoistre le tout & d'õner ordre qu'aucune chose ne s'y passast qu'avec l'honneur de Dieu, assistez de messire Maximiliem Hubert docteur theologal de nostre Eglise de Lengres archediacre du Dijonnois, de Me Noël Facenet Bachelier en Theologie, Chanoyne de ladiete Eglise, nostre grãd Vicaire, de Maistre Iean Monjardet aussi Chanoine & Chancelier de ladiete Eglise, Secretaire ordinaire en nostre

Euesché, de maistre Pierre Mazoyer docteur en medecine, de maistre Iean de Guinant maistre chirurgien de nostre ville de Langres, de maistre Nicolas du Doyer nostre chirurgien ordinaire, nous nous sommes transportez sur ledit lieu de Corgirenon le Dimanche 13. iour de Iuillet 1603. & là premierement auons fait celebrer, pour inuoker le nom de Dieu & sa saincte assistance, auons aussi par vne predicatio fait exhorter tout le peuple, à ce qu'il eut par ses prieres à implorer le secours de la diuine Majesté, pour par ce moyé impetrer de luy lumiere suffisante à cognoistre quelle estoit sa volôté touchant les susdites fontaines, & son ayde pour empescher qu'aucune fraude de l'ennemy cōmun de tout le genre humain ne simmiscea en ceste affaire, puis apres le seruice diuin estant acheué, nous nous sommes acheminez sur le lieu où estoiet lescdites fontaines, & auons par l'inuocation du nom de Dieu, exorcisé les eaux, & auōs recogneu là estre vne grande affluēce de peuple, & en iceluy plusieurs malades, desquels vne partie s'est représentée à nous, finalement considerant que le tout requeroit vn long sejour, lequel nos affaires ne permettoient que peussions faire là, auons delaisé nos susdits assistans, pour prédre garde à tout, & dresser procès verbal de ce qui seroit necessaire, pour alfoir iugement de mesme force & valeur comme si nous-mesmes eussions esté presents en per sonne.

N O V S donc cy dessus denommezuyuant le mandement de Monseigneur de Langres, faisant sejour au lieu de Corgirenon pour recognoistre

tout ce qui s'y estoit passé & passoit touchant les
 susdites fontaines, auons iugé qu'il estoit neces-
 saire de premierement remarquer la situation
 desdites fontaines, & faire espreuve des eaux par
 les moyens instituez de nature, ce qu'auons fait
 ainsi que sensuyt.

En ceste presente année 1603. enuiron le tēps
 de Pasque, quelques passans s'apperceurent que
 en vn lieu du finage dudit Corgirenon, nommé
 vulgairement Touillon, distāt dudit village d'en-
 uiron 165. toises, s'estoient ouuertes deux fon-
 taines qui iamais ne s'y estoient veuës, separees
 l'vne de l'autre de sept toises & demie, sortant
 d'un mesme champ qui lors estoit ensemeccé de
 froment : la place d'icelle est pleine, & seulemēt
 s'esleuent à l'enuiron vn bien peu les terres, or-
 mis du costé de l'Occident, où elles fluent. La
 terre du lieu est blanche comme de sable ou ar-
 buë, au bas d'icelles fontaines du costé d'Occi-
 déty a vne petite source d'eau de toute ancien-
 neté, de mesme saueur que les susdites fontaines
 laquelle ne s'est ny augmentee ny diminuee par
 la production de celles que nous parlons, & ne
 se trouue que de bien loing d'icelle y aye autre
 eauë, soit de fontaine, ruisseau, marefcage, ou au-
 tre, d'où lon puisse coniecturer ces fontaines a-
 uoir pris leur origine, veu que toute ceste con-
 trée est destituée d'eau, elles-mesmes ne cōmu-
 niquent point leurs eaux l'vne à l'autre, comme
 lon a cogneu en ce que l'vne estāt troublee, l'au-
 tre ne laisse d'estre fort claire, & mesmes sont
 differentes en couleur & saueur, d'autant que
 celle qui tire le plus du costé de l'Orient est tou-

siours plus épaisse , & conséquemment resene plus la terre. Au reste toutes deux iettent l'eau en telle abondance , que ny les secheresses , qui ont esté grandes les mois passez, ny la multitude des peuples, qui tousiours en puyssent abondamment, y apporte aucune diminution. En outre auons , tant nous qu'autres , gousté les susdictes eaux, & auons recogneu qu'elles n'ont aucune saueur extraordinaire , ains commune à toutes les autres eaux, excepté que (comme dit est) celle qui tire plus du costé d'Oriét sent plus le limon de la terre : Nous les auons fait cuire iusques à la subsidence & cendre , & auons gousté que le reste ne sent que la terre. Et estant alambiquées n'ont apporté autre saueur que celle qu'elles auoient au parauant: Pesées à l'encontre d'autres, elles se sont trouuees de mesme poix: Seulement l'eau de la fontaine qui regarde plus l'Orient semble vn peu grasse & vinctueuse, quand on s'en laue, mais cela se peut rapporter à la mixtiou de la terre qui la rend tousiours trouble, cōme dit est, ce qu'auons esprouué en meslant de l'eau de l'autre fontaine avec la terre du lieu.

Ces fontaines donc estant apparües au temps qu'auons dit cy dessus , & estant telles que les auons descriptes , ont acquis la reputation d'apporter guerison aux malades & vlcerez par la maniere qui sensuit.

Ieanne Cheualier vefue de feu Nicolas Varney aagée d'environ 50. ans demeurant au village de Corgirenon interrogée par nous le lundy 14. iour de Iuillet an que dessus, à dit que le lā^r demain de la Pentecoste dernièrement passée
estant

estant au deuant de son logis avec ses voisines
entédit que quelque nouuelle fontaine s'estoit
leuée en la contree de Thouillon proche le vil-
lage, & sur ce subiect resoluë avec ses cōpagnes
de les aller veoir, où estans allees en burent &
treuuerent l'eau bonne. Mais elle en particulier
deposante dit ainsi, i'ay vne douleur au bras, il
faut que ie sache si ceste fontaine auroit vertu
de me guerir. Elle print donc de l'eau & en l'aua
son bras dextre, qui lors luy faisoit grande dou-
leur, & des l'hiuer au parauāt ne s'en estoit peu
feruir pour filer. Puis apres s'en retournāt avec
ses voisines estant à peine esloignee des fontai-
nes de 5. passées, s'apperceut que la douleur de
son bras estoit cessée, qui fut cause qu'elle re-
tourna soudainement à ladite fontaine pour es-
prouuer si elle pourroit de mesme guerir son
genouil gauche enflé qui luy faisoit aussi grande
doleur, & ne permettoit qu'elle prit repos la nuit
Et l'ayant lauë sentit peu de temps après sa dou-
leur appaisée, son genouil s'estant desenfle, ce
qu'aussi tost elle dit à ses cōpagnes, & quelque
iour apres à vne femme du Fayl, nommée la gran-
de Marie qui passoit par Corgirennon, Et se plai-
gnoit à elle qu'elle auoit de grandes douleurs
aux yeux: Et quelque foiblesse & debilité aux
iambes, tellement qu'elle disoit ne pouuoir re-
tourner ce iour la iusques au Fayl lieu de sa de-
meurance quoy qu'il ne soit distāt de Corgire-
nnon que d'vne lieue, lors ladite deposante luy
raconta, comme elle auoit receu la guetison
susedite, se lauuant es fontaines de Thouillon &
que si elle y aloit, elle s'en pourroit biē trouuer.

Ce qu'elle fit, & ayant beu de ladite eau se trouua bien de ses yeux, & iambes. Le mesme iour auons intetrogé ladite grande Marie Gudy demeurât au Fayl, laquelle nous a affermé la chose s'estre passée ainsi que nous a esté déclaré par ladite Ieanne cy dessus, de sorte qu'elle se porte tresbien & de ses yeux & de ses iambes, comme il nous est apparu, quoy que sesdits yeux fussent au parauant tellemét troublez, qu'à peine pouuoit-elle veoir aucune chose. Deslors le bruit s'espancha par tous les lieux à l'enuiron, de la vertu & faculté de ces fontaines.

En consequence donc & suytte de ce bruit, sont arriuez incontinent plusieurs à ces fontaines, & sont ensuyuis les effects tant ceux qui au parauant nostre arriüée icy se sont veuz manifestement, que ceux qui depuis nostre arriüée.

Or premierement auant nostre arriüée Ieanette Perrin demeurant és Loges proche dudit Coigirennon, aagée de quatorze ans, interrogée par nous, à dit : que pendant vn mois elle auoit eu tout le visage difforme, chargé de morfée, & grosses galles qui luy caufoient de grandes douleurs, & qu'ayât laué sondit visage plusieurs fois l'espace dez. iours, des eaux delldites fontaines, elle auoit receu entiere guerison, cōme de vray, nous a bien apparu, pour ne rester que bien peu de vestiges & marques des susdites galles, quoy qu'au parauant vn chacun l'eust cogneuë toute chargée d'icelles.

Pierre Aubriel demeurant au village des Loges aagé de 40. ans, interrogé par nous le Lundy 4. dudit mois de Iuillet, à dit : qu'estant detenu

d'vne grãde douleur de reins & du petit ventre, de sorte qu'il demeueroit tout courbé, s'achemina aux susdites fontaines, & ayant beu des eaux plusieurs fois, & laué par le ventre & dos, vn iour senlement, s'en retournant en sa maison fut contraint de s'arrester en vn bois, où estant tourmenté de grãdes douleurs des susdites parties, en fin ietta vne pierre de la grosseur & longueur d'un noyau de cornulle, laquelle il monstra à plusieurs de ses voisins, & depuis s'est toujours bien porté.

Girard Iachiet laboureur hosteliet dudit Cor-girenon, estant appelé & pris par serment, à dit que chez luy auoit logé vn ieune hõme de bonne façon, nommé Monsieur Lambert demeurant à Dijon à la suite de Monsieur le Grand, lequel à son arriüée estoit tellement incommodé de la personne qu'il ne pouuoit marcher ny se baïsser, ny mesmes mouuoit les bras, ains traïnoit la iambe gauche & sentoit de grandes douleurs, & s'estant laué plusieurs fois des eaux des susdites fontaines l'espace de douze iours, dès le troisieme receut allegement, & finalement fut du tout guery, & aussi disposé que iamais, & nous-mesmes l'auons veu à nostre arriüée qui estoit sur la fin des susdits douze iours le portant fort bien nous racõtant sa maladie cy dessus. Au mesme temps ledit Iachiet nous a affermé auoir logé en sa maison vn garçõ aagé de 15. ou 16. ans, natif de Dijon, qui lors de son arriüée estoit tellement impotët, qu'il ne pouuoit marcher sans crosse, estant tourmenté de grandes douleurs depuis cinq ans. Ice luy s'estant laué & beu de la

dite eau l'espace de trois iours, s'en retourna à pied sans crosses, estant du tout guery.

Le Lundy 16. iour de Iuin 1603. Claude Logier le ieune, du village de Gillaucout à deux lieues de Chaulmont est arrivé à la fontaine environ les 6. heures du soir & dedans vne heure à esté guéri des douleurs qu'il disoit auoir sur les reins iusques au pied, telles qu'il luy sembloit qu'on luy tirasse les nerfs des mēbres, mesme ne pouuoit marcher qu'à grandes peines & avec crosses & estoit en cest estat depuis 5. ans pendant lesquels il auoit cherché guerison par tout & iamaïs ne lauoit peu treuuer que par les eaux de la dite fōtaine, & ainsi nous la assuré M. Gilles Bracornier qui demeure audit Corgirenon.

Le Samedy 28. iour de Iuin arriva à la fōtaine susdite le Sieur Moisson curé de Sainct Medard Preuost & Chanoine de S. Estienne de Dijon lequel disoit souffrir de grandes douleurs, & deuoyemēt d'estomach, douleurs de reins, & iambes. A son arriuee apres auoir esté à l'Eglise fut à la fontaine où il beut de l'eau depuis la retournée au logis, disna disāt qu'il se sentoīt trop mieux que du passé trouuant les viādes de goust. Et apres disnē se ptomenāt trouua sō estomach fortifié & ses reins restablis en sō naturel. Ceux qui l'assistoiēt s'esioũssans avec luy certifiōiēt l'auoir veu auparanant & de long temps ne pouoir porter sa viande, puis apres cōtinua iusques au lundy d'vser de ladite eau & s'en partit sain & en tresbonne disposition ainsi la attestē ledit Maistre Gilles Bracornier habitant du dit Corgirenon chēs lequel il estoit logé.

Nicolas Brayer dit Cortet demeurât aux lo-
ges aage de 45. ans enquis par serment a depose
que la veille saint Barnabé derniere, luy estant
surueueüe vne grâde douleur au pied droit pres
les cheuilles avec enflures de sorte qu'il ne pou-
uoit reposer, & arriuant que sa femme retourna
des susdites fontaines apportant de l'eau, il s'en
laua le pied & se sentit guery à la mesme heure,
qui l'occasionna luy mesme s'acheminer vers
lesdites fôtaines ou il en beut & sen laua, & s'est
du depuis porté tousiours de mieux en mieux.

Collete Garnier femme de Martin Nardin aa-
gee de 50. ans demurant à Chalindrey estant
enquise par serment nous a déclaré comme elle
estoit detenue depuis 3. ans & demy de retra-
ction des nerfs aux deux bras & mains, de sorte
qu'elle ne pouuoit s'en aider en façon quelcon-
que, ayant tous les doigts des mains retirés &
crochus. Et en outre estoit vexee de grâdes dou-
leurs & inflations es deux genouils & iambes
pres les cheuilles, de sorte qu'à grande peine
pouuoit elle marcher. Et s'estant transportée
au lieu desdites fontaines, & y ayant demeuré
neuf ou dix iours beuant & se lauuant ordinai-
rement desdites eaus, fut entierement guerrie &
s'en retourna à pied maniant ses bras & ioignât
les mains, & a tousiours continué de se porter
de mieux en mieux continuant aussi l'vsage des-
dites eaus. Jean Auigné & Guillaume Pioche
demeurât à chalindrey a attesté auoir veu ladite
Collette affligée des maladies cy dessus comme
aussi d'autres habitans du village.

Antoine Beaurepaire aagé de 20. ans demeu-

rant à Chalindrey enquis par serment nous à
aussi déclaré que depuis l'aage de 4. ans auoit
esté detenu d'une paralysie du bras droit & iam-
be droicte ayant les doigts de ladite main telle-
ment serrés & retirés qu'on ne luy pouuoit ou-
vrir ny fermer. Et ayât vſé l'espace de 5. sepmai-
nes desdites eaux se porte bien d'iceluy bras, le-
quel estoit atrophie, & commence à reprendre
sa nourriture, ouure & ferme les doigts de ladi-
te main en sorte qu'il trauaille à present en la
grange, va aussi plus droit qu'auparauant & se
porte bien de ladite jambe.

Plus grande recherche des effets des susdites
fontaines n'a semblé estre necessaire, par ce que
le nôbre en est si grand, & sont iceux espanchez
par tant de contrees & pays tant proches que
remotes, qu'à grand' peine en pourroit on faire
vn recueil entier.

Sensuyuet les effets des susdites eaux cogneus
par nous susdits de pures pendant nostre seiour
à Corgirenou, pour lesquelles plus assurément
cognoistre, incontinent apres nostre arriuee au
dit lieu, auôs donné tel ordre que ayant mis des
officiers en la garde desdites fontaines, aucun
malade ne s'en pouuoit approcher que premie-
remēt il n'eust esté visité par nous. Et depuis visi-
tant deux fois le iour pour le moins les malades
auôs cogneu quels progrès ils faisoient en san-
té comme il sensuyt.

Claude Vallon demeurāt à Prouencheres pres
Vesou aagé enuiron de 15. ans estant visité par
nous, à dit que le lendemain de la feste de Noël
dernierement passée retournant de Brurey vil-

lage distant de demye lieuë de son pais, seroit à l'instant tumbé en paralysie des deuxcuïses en sorte qu'il ne pouuoit aucunement se soustenir sur icelles & estoit contraint de marcher sur ses genouïlx & sur ses mains. Estant donc venu express en ce lieu de Corgirenon le 6. de ce present Mois de Iullet apres auoir beu plusieurs fois de l'eau des fontaines, & s'en estre lauë se trouue maintenant beaucoup mieux, se peut supporter sur les iambes ce qu'il ne pouuoit faire au parauant. Aiusi l'auons veu & cogneu.

Denys Morisot demeurât à Dijon aagé de 12. ans estant detenu des escrouelles en plusieurs lieux du visage & au pied dextre comme il nous est apparu, s'estant lauë desdites eaux, commence à se bien porter, & noimmément au pied.

Denise femme de Claude Gros-Jean demeurant à Vitry pres Chauvirey, aagée enuiron de 40. ans, estant detenue d'une ophthalmie depuis deux ans en l'œil gauche, s'estant lauee se trouue fort bien.

Guillemette Perruse natieue de Chaulmont, aagée enuiron de 17. ans, ayât toute la teste couuerte de la mauuaise rigne, s'estât lauée plusieurs fois, se trouue quasi du tout guerie.

Nicolas Millot de Charmoy pres le Fayl aagé de 43. ans, ayât vne retraction de nerfs aux deux iambes, & ne se pouuât soustenir sans potences, estant icelles iambes toutes enflées, apres s'estre lauë plusieurs fois s'est bië trouué, & peut maintenant marcher sans potences, ayât lesdites iambes entierement desenflees.

Claude Gobillot demeurant à Varennes, la,

bourreur, aagé enuiron de 20. ans, estant detenu de plusieurs vlceres és cuisses & iambes, avec grâdes douleurs, a beu & s'est laué plusieurs iours de ladite eau, & maintenant se porte bien, & les vlceres consolidez.

Jannette Rousselot de Dijon aagée de 68. ans, vefue de Claude Focillon auoit à cause d'un cathetre, vne retraction de nerfs aux deux mains, ne pouuant ouuir aucun doigt, & en outre vne enflure & douleur en la cuisse & iambe dextre. Apres auoir vsé des eaux des susdites fontaines neuf ou dix iours, a esté guaratie du mal & enflure de ladite iambe, & peut aussi maintenant ouuir & fermer les mains comme elle veut.

Jeanne Guillardot femme d'Anthoine Thoirier, laboureur demeurât à Mailly pres d'Aulon, ne, a apporté vne sienne fille aagée de trois ans nommée Claude Thoirier, laquelle estoit fort emaciée & atrophiee, en sorte qu'elle ne se pouoit soustenir sur ses iambes. Ayant beu de l'eau & lauee par sa mere, auant cinq iours à marché toute seule, & se porte bien.

Nicolle Brugere demeurant à Dijon, ayant demeuré l'espace de neuf iours en ce lieu, ayât beu desdites eaux, & s'en éstât lauee, s'en ést retournée saine & guerie du mal du bras dextre qu'elle auoit avec douleur, en sorte qu'elle ne pouoit trauallet, & est sortie d'icy le 16. dudit mois de Iuillet, s'estant representée à nous.

Vn certain homme bien habillé & bien en ordre, demeurant à Isurtille qui n'a voulu dire son nō quoy que requis plusieurs fois, dit qu'il sentoît vn grand mal du costé fenestre depuis le col,

col iusques au bas du ventre, luy occupât la plus grande partie du thorax & du ventre, luy causât douleurs, mesmes empescheant toutes ses fonctions. S'estant lauë & beu desdites eaux 7. ou 8. iours s'en est retourné sain & net, ainsi que l'a-uons veu à son departement.

Marie Bar femme de Claude Amyot demeurant à Mailly proche S. Jean de l'Osne, arriua en ce lieu le Samedy 12. dudit mois de Iuillet estant impotente desdeux mains en sorte qu'elle ne les pouuoit fermer ny ouurir, ny leuer les bras plus haut que sa poitrine: s'estant lauee desdites eaux & beu par trois iours d'icelles, estend de-ja les mains & leue ses bras facilement sur sa teste.

Iacques Bricatd natif de Rouëlle & demeurât à Diion Marechal aagé de 12. ans ayant deux vlcères en la iambe dextre & ayant esté long tēps entre les mains des Chirurgiens où il ne trouua aucun allegement est venu expressement à ses fontaines & s'estant lauë l'espace de 8. iours s'est trouué fort soulagé, de maniere que ses vlcères viennent à cicatrices.

Iean Sageot de Pesme Mâtechal aagé de 16. ans ayant deux grands vlcères és deux iambes appellez vulgairement loups, ayant vsé des eaux des susdites fontaines l'espace de 8. ou 9. iours se trouue fort soulagé de ses douleurs & ses vlcères en fort bonne disposition de guerison, ce qu'il n'auoit trouué en la fontaine de Fribourg en Suisse, à laquelle il s'estoit acheminé, & ny auoit receu soulagement.

Barbe Goussel femme de Pierre la Granche de

ny pres Beaulné aagée de 40. ans estant dete-
nue d'une espeece de herpes par le visage depuie
9. ans, dont elle n'auoit peu trouuer guerison
alieurs, apres auoir vsé tât interieurement qu'ex-
terieurement desdites eaux en à receu guerison
ny restant plus qu'une rougeur au visage.

Marguerite femme de Iullien de Chastoillon
demeurant à Frôtigney pres la Charité en Bor-
gongne aagée de 50. ans estant affligee au bras
gauche de tumeurs scrophuleuses depuis quatre
ans, lesquelles auroient apostumé dõt elle auoit
grandes douleurs & inquietudes, ne pouuant
ouurir ny fermer la main dudit bras, ayant beu
des eaux susdites & s'en estant lauee plusieurs
fois s'est trouuee fort allegee & à peu pres gue-
rie comme nous auons veu.

Hugues Bersin vigneron demeurant à Char-
rey pres Vesou aagé de 44. ans estaut tombé de
dessus vn poirier fort haut se seroit disloqué la
cuisse droite avec vne grande contusiõ depuis
enuiron 9. mois de sorte qu'il ne se pouuoit sou-
stenir sur ladite iambe, ayant beu & s'estât lauë
desdites eaux l'espace de 9. ou 10. iours, ne resset
plus de douleurs & commence à se supporter.

Ogier Iolois d'Isurthille aagé de 40. ans, vint
à la susdite fontaine le 4. de Iuillet ayant vn grãd
vlcere malin & de figure rōde, dont il estoit de-
tenu depuis six sepmaines, & ayant vsé plusieurs
fois de l'eau d'icelles tant en breuuage qu'appf-
ications exterieures, s'est trouué sa playe à demy
guerie.

Claude de Verges de Treffort, pres Bourg en
Bresse, est arriné le 14. Iuillet audit lieu de Cor-

girenou, ayant plusieurs grâds vlceres en la iam-
be droicte, lequel ayant vſé comme deſſus deſ-
dites eaux, commence à ſe bien porter, ainſi que
nous auons recogneu.

NOVS medecin & chirurgiens ſuſnommez,
eſtâs employez à la recherche des vertus & pro-
prietez des ſuſdites fontaines, depuis le 12. du
preſent mois de Iuillet, iuſques au 17. d'iceluy,
auôs recogneu par les eſſets d'icelles eaux, à l'en-
droit des malades qui ſe ſont trouuez au lieu de
Corgireuon, pendant ledit temps, qu'icelles ont
quelque prerogatiue & ſignalee vertu, tant en la
guerifon de pluſieurs vlceres ſerpigineux & ca-
coëthes, que debilités de membres, conuulſions
de nerfs, douleurs flatueuſes des iointures, ereſi-
peles & inflammations, comme il appert par le
rapport des malades par nous viſitez, cy deſſus
eſcrit, en ſorte qu'eſtimôs icelles auoir quelque
particuliere vertu plus que les eaux communes,
& pouuoir apporter quelque vtilité au bien pu-
blic: en teſmoing de quoy auons ſigné le preſent
rapport, ce iourd'huy 17. Iuillet, 1603.

S I G N E'

M A S O V Y E R Docteur
en Medecine,

D E G V I N A M,

D V D O Y E R.

NOUS CHARLES DESCARS
 Evêque, Duc de Langres, Pair de
 France, Commandeur de l'Ordre du S.
 Esprit, & Conseiller du Roy en ses Con-
 seils d'État & Privé, apres avoir bien cõ-
 sideré ce que dessus, & avoir veu nous-
 mesmes par plusieurs fois tout ce qui s'est
 passé és susdites fontaines, assisteZ (comme
 dit est) avons déclaré & declarons que lon
 se peut approcher & user des susdites fon-
 taines, sans soubçon d'aucun malefice ou
 fraude: Deffendons neantmoins, qu'aucu-
 ne superstition ou vaine observance sy cõ-
 mette par ceux qui s'en approcheront, les
 exhortans rapporter le tout à la gloire de
 Dieu, qui par tant de façons espanche ses
 bien-faits sur les hommes. Faict à Grosse-
 saulne proche le village dudit Corgirenon,
 le 17. de Juillet, 1603.
 signé,

CHARLES DESCARS
 Duc de Langres.

Facenet. Hubert. Moniardet.



AV LECTEUR.

AMY lecteur tu as veu quel iugement se fait de ses eaux, & dois penser que troys opiniõs toutes diuerſes ſe peuvent donner icy, deſquelles les deux vont par les extremitez, & la tierce ſe contient au milieu. La premiere qui ſuit l'extremité ſeroit que ces eaux n'ont aucune vertu ny faculté par deſſus les autres eaux communes. Et ceſte opinion ne ſemble vraye cõme il conte par les effects, parce que l'eau commune ne peut produire autres effets, que raffrechiſſement & humectation, n'ayant autre faculté actiue en ſoy que la froidure, & l'humidité. Or nous voyons que ces eaux de Corgirennon non ſeulement ont telles facultés naturelles, mais en ont encore d'autres du tout contraires, ſinon reellement & formelement, à tout le moins en puissance & vertu. Car elles deſechent les vlceres, & ramolliſſent & addouciſſent les nerfs, comme euidẽment il appert es cures qui ſi font. La ſecheſſe repugne à l'humidité, & le ramolliſſement à la froidure. Par ainſi il faut confeſſer qu'il y a quelque faculté plus haute que icelle qui ſe preue es eaux communes, Et ne ſeruiroit de dire que ce ramolliſſement ſe peut faire par la froidure de l'eau, & ce par accidens, aſſauoir que la froidure fait retirer la chaleur exterieure des membres au dedans, & conſequẽment eſchauffe le nerf & le ramollit. Car ce qui ſe faiet par acci-

dant, ne se fait tousiours ainsi, ains rarement. Or il se voit en ce fait que ces eaux ont causé ces effects en tous ceux qui en ont vsez. Dauantage qui est le Medecin qui iamais aye pésé les paralusies avec de l'eau fraiche, & commune. Autre faculté donc se retrouve en ceste ci trop plus excellente que és eaux vulgaires.

L'autre opinion extrême seroit dire que les operations de ses eaux sont miraculeuses. Et cela ne se doit aussi dire, par ce que tout miracle surpasse l'œuvre de toute nature en deux choses, premierement en la substance du miracle, secondement en la façon & maniere d'operer. La substance du miracle est quand la chose ne se peut aucunement faire par causes naturelles, comme pour exemple seroit la suscitation d'un mort, ou reestablissement des yeux entierement perdus. Le miracle en façon & maniere est quand la chose se pourroit faire par les causes naturelles, mais nō pas en la façon que la vertu opératrice des miracles la faict, comme dire, rendre la santé en vn instant à vn febricitant, d'autant que les forces & causes naturelles n'agissent qu'avec laps de temps. Or est il que les eaux ne font aucune guerison ny effects qui ne se puissent faire par les causes, & remedes naturels, & n'operent qu'avec le téps & lentement. Par ainsi il ne si doit establir miracle.

Sensuyt donc qu'il faut admettre. La troisieme opinion, qui est que en ses eaux se retrouve vne faculté naturelle seulement, mais plus excelente que es eaux communes, laquelle opinion se preue aysement par la confutation des

deux premieres. Car il est certain que ces eaux sont douces de quelque vertu, laquelle n'est cōmune à toutes eaux comme nous auons prouué en confutant la premiere opiniō. Et n'est miraculeuse, comme nous auons preuue en confutant la seconde opinion. Reste donc à dire que ceste vertu demeure es termes de nature, quoy que plus excellente que les eaux communes, & n'arriue à l'excellence des miracles: en vn mot, c'est vne faculté naturelle plus haute que la faculté ordinaire des autres eaux, & pl⁹ basse que la miraculeuse. Autant en faut il dire de toutes autres eaux salubres, esquelles l'on ne peut nier quelque vertu resider plus grande que es eaux communes, & neantmoins nous n'attribuons cela aux miracles. Que si quelcun demandoit, quelle peut estre ceste vertu, & d'où elle peut estre infuse & communiquee à ces eaux, veu que elle ne se descouure point par aucun sentiment, cōme nous cognoissons plusieurs eaux retenir quelque qualité du souffre, ou alun, ou nitre ou autre chose semblable. Il se repond qu'il faut confesser librement que iusques icy ceste vertu est occulte en soy, & seulement manifeste en ses effects. La recherche s'en deuoit faire plus à plein par ceux qui pourroient y apporter plus d'industrie & iugement. Par ainsi ceux qui ont esté employez en cest affaire, ont encore laissé place aux autres pour y exercer la pointe de leur esprit, bien te soit.

F I N